

Esaki ta e 10 aerolinenan mas puntual di mundo durante 2022



NEW YORK: Aña 2022 tabata uno importante pa recuperacion di e sector aereo, despues cu e tabata full paraliza debi na pandemia di Covid-19. Sinembargo awor e industria mundial ainda no a recupera e cifranan cu nan tabatin na 2019, y estadistica ta mostra cu salud di vuelonan durante 2022 ta na 19 por ciento bao di e cifranan di 3 aña pasa, segun un rapport emiti pa e consultorio internacional Cirium.

Segun e investigacion, durante 2022 e aerolineanan di rond mundo a transporta mas di 31 milyon pasajero, cu ta un aumento di 26 por ciento compara cu 2021.

Encuanto e ranking, Delta Airlines a gana pa di dos aña consecutivo e premio Cirium Platinum, cu ta reconoce e operacion excelente y compromiso di sigui mehora cada rato. No obstante, e aerolinea aki a yega na Puesto #5 di compania na mundo riba e lista di esnan mas puntual.

E rapport a revela tambe cu e aerolineanan mas puntual na Latino America durante e aña cu a pasa, a wordo lidera pa Azul Linhas Aereas Brasileiras cu 88,93 por ciento di puntualidad. E ta wordo sigui pa Sky Airlines cu

88,74 por ciento, Copa Airlines cu 88,02 por ciento, LATAM Airlines cu 86,31 por ciento, Avianca cu 83,48 por ciento, Aerolineas Argentinas cu 82,02 por ciento, Aeromexico cu 75,83 por ciento, y Volaris cu 71,61 por ciento.


Cirium a haci calculo tambe di e aeropuertonan mas puntual di mundo na 2022. Na prome lugar eynan tin Tokyo International Airport cu 90,33 por ciento di puntualidad. E ta sigui pa Bangalore International Airport na India cu 84,08 por ciento. Na di tercer lugar tin Salt Lake City International Airport cu 83,87 por ciento.

Esaki ta e top 10 Aerolineanan mas puntual di mundo:

1. Azul Linhas Aereas (88,93%).
2. All Nippon Airlines (88,61%).
3. Japan Airlines (88,00%).
4. LATAM Airlines (86,31%).
5. Delta Airlines (83,63%).
6. Avianca (83,48%).
7. Emirates (81,30%).
8. United Airlines (80,46%).
9. Qatar Airways (78,32%).
10. American Airlines (78,29%).

Nos Historia Nos Herencia

Fakkeloptocht - Parada di Flambeau



Fakkeloptocht of Parada di Flambeau semper tabata masha popular na Aruba y tin un lugar den Historia di Aruba.

Den añanan 40 pa 50 di siglo pasa pa e celebracion di Aña di La Reina, militarnan y polisnan Hulandes na Aruba tabata marcha den cayanan di Aruba cu nan flambeau. Mas despues gruponan di verkennertj y padvinder tabata organisa nan marcha di flambeau den diferente bario na Aruba.

Den e temporada cu wandelmars tabata masha popular na Aruba, gruponan social y di amigo tabata haci nan paseo anochi cu nan flambeau. E tempo ey tabata usa palo seco cu ta haya for di e parti paden di Cadushi of Breba y ta lora un paña na e parti ariba di e palo y hunta un tiki kerosine ariba dje y ta cende esaki na candela.

E prome "Fakkeloptocht" den ambiente di Carnaval di Aruba Tivoli Club a tuma lugar na aña 1967. Por bisa cu parada aki a sali for di cas di Ru Arends den Adriaan Lacle Boulevard direccion di Club di Tivoli den Wilhelminastraat. E tempo ey a fia "Fakkel" di Mariniers Kazerne pa usa den e parada. E parada tabata acompaña

pa un steelband. Diferente hende tabata cana cu nan "fakkel" den nan man.

Segun e añanan ta pasa e popularidad di "Fakkeloptocht" a crece y mas hende tabata participa. E tempo ey ainda tabata tin un solo tema pa e parada. E ruta tambe a conoce cambio. Un tempo a cuminsa e parada ariba e "parking lot" dilanti Hotel Central (unda un tempo tabata organisa Watapana Festival). E parada tabata move direccion Hendrikstraat, pasa den verboden den Hendrikstraat y bira robes na Spritzer & Furhman y drenta Nassaustraat (Caya GF Croes) y ta sigui te na skina di Nicky Habibe bira drechi drenta Columbusstraat y despues bira atrobe robes ariba Wilhelminastraat direccion Aruba Tivoli Club.

Segun añanan ta pasa a usa e ruta di school MTS Cersare Terzano (awor Colegio EPI) drenta Wilhelminastraat direccion Aruba Tivoli Club. Mientras cu e popularidad di e parada a crece a amplia e ruta y tabata sali for di MTS Cersare Terzano direccion Vondellaan, LG Smith Boulevard caba na DOW. E ruta di parada mas actual ta esun di Avenida Milio

Croes, Vondellaan, LG Smith Boulevard direccion DOW. Tabata sigur un of dos aña cu a cuminsa cu e parada for di DOW direccion Veld di Cricket den Vondellaan.

E parada di Flambeau tambe a desaroya su mes. E interes bao di e miembronan di Aruba Tivoli Club a disminui completamente y te na ultimo algun miembro di Aruba Tivoli Club ainda tabata organisa e Parada. Esaki tambe a termina y e tempo ey SAC a adopta e parada. Na e momento aki SMAC ta organisa e parada. E parada su tema ta completamente habri pa tur grupo y tur hende. Loke a cuminsa antes cu Parada cu un of mas steelband, brassband, sound system (tec) ta awe un parada cu banda grandi.

Loke ta e "Fakkel" mes esaki a disminui completamente. Sporadicamente por encontra un fakkel den e Parada.

E bistimento mes ta t-shirt tur decora, cu algun lus ariba dje.

Aruba Tivoli Club mes no ta existi mas.

Compila pa Roberto Croes
Nos Historia Nos Herencia